

Jocet Beda supra. Et ratio est clara, quia sicut potest in dominicam incidere 14 luna, ita in feriam secundam, et quamcumque aliam, usque ad sabbathum: solum autem excluditur Pascha ab ea dominica, quæ fuerit 14 luna, et tunc celebratur in proxima dominica sequenti, ac subinde in 21 luna: si autem 14 luna sit sabbathum, celebrabitur in 15 luna, ut ostensum est, et sic consequenter de reliquis diebus intermediis: ultra 21 autem lunam differri non potest dominica, quia jam non esset prima post 14 lunam. Objiciet vero aliquis Innocentium I, epist. 11, dicentem, in 23 luna nunquam celebrari Pascha, qui proinde videtur sentire in 22 posse celebrari. Sed nulla est conjectura; ibi enim docet id quod suo instituto sufficiebat; docebat enim quoddam Pascha, de quo dubitatur, celebrandum fuisse in luna 16, quia alias differendum fuisset usque ad 23 lunam, quod dicit esse contra morem inviolabilem. Deinde dico, potius ex illa epistola colligi, posse Pascha celebrari altera die post æquinoctium, scilicet, 22 martii, quod non potest esse, nisi etiam celebretur in 15 luna, quia non potest decima quarta præcedere nisi in die sabbathi, alias caderet ante æquinoctium, quod esse non potest.

24. *A 22 die martii usque ad 25 aprilis potest incidere Pascha.* — At vero si loquamur de mensibus solaribus, licet olim aliquibus Patribus visum sit tempus, in quo incidere potest Dominica Paschæ, solum extendi a 22 die martii usque ad 20 aprilis, ut patet ex epistola Synodali Theophil. Cæsar. apud Eusebium, lib. 5 Historiarum, cap. 23, et ex epistola 64 et 65 Leonis Papæ; nihilominus postea certa ratione compertum est, extendi illud tempus usque ad 25 diem aprilis, ut nunc observatur. Ut ratio utriusque partis breviter intelligatur, supponendum est æquinoctium vernum cadere in 21 diem martii; ita enim in Concilio Niceno declaratum est, et constitutum, tanquam magis certum et stabile; et ut dies illa certa semper maneret, per Kalendarium Gregorianum ad suam sedem restituta est, et modus inventus, quo perpetuo in ea conservetur, ut late prosequitur Clavius in libro allegato. Hoc ergo posito, facile ostenditur prior pars, quam aperte docuit Innocentius I, in dicta epistola 11, quia contingit ut 14 luna in ipso æquinoctio simul in die sabbathi incidat, hoc enim ex ipsis motibus solis et lunæ manifestum est. Tunc ergo dies dominica sequens erit paschalis, juxta su-

perius dicta, quia erit prima post æquinoctium, et post 14 lunam; tunc ergo Pascha erit 22 die martii; ergo ab illo die potest incipere Dominica Paschæ, et consequenter eodem modo facile probabitur posse cadere in 23, quia 14 luna potest cadere in feriam sextam, et in eandem incidere æquinoctium, seu 21 dies martii, et consequenter dies 23 erit Dominica Paschæ; vel etiam potest accidere ut 14 luna cadat in sabbathum post æquinoctium præcedens in feria sexta, et tunc redit eadem necessitas celebrandi Pascha in die 23 martii, et sic de aliis.

25. Quod vero tempus extendatur usque ad 25 aprilis, et ibi terminetur, ratio est, quia potest luna 14 primi mensis cadere in diem 18 aprilis, et esse dies dominica, quæ proinde non potest esse paschalis, juxta principia posita; ergo tunc necesse est Pascha differri usque ad diem 25. Consequentia clara est, et antecedens patet, quia si novilunium martii cadat in septimam diem martii, ut facile potest, tunc ille non erit primus mensis anni sequentis, sed ultimus præcedentis, quia decima quarta luna ejus cadet ante æquinoctium, ut facile computanti patebit; cadet enim in 20; æquinoctium autem est in 21, ut positum est; ergo annus lunaris potest finire in quarto die aprilis inclusive; ergo primus mensis anni lunaris potest incipere quinto die aprilis; ergo tunc 14 luna cadet in decimum octavum diem; ergo si contingat esse dominicam, ut facile potest, cadet Pascha in 25 die aprilis; ergo tanta est latitudo dierum mensium solarium, per quos potest variari dominica paschalis. Et inde facile colligi potest, novilunia, quæ dicuntur paschalia (id est, apta ut celebrationi Paschæ deserviant), ab octava die martii incipere, percurrere autem usque ad quintum diem aprilis inclusive, ita ut in quocumque ex omnibus illis viginti novem diebus intermediis, novilunium contingat, illud sit in illo anno novilunium paschale, quia in prima dominica post 14 lunam ejus celebrandum erit Pascha, ut ex dictis satis liquet.

26. *Proponitur difficultas prima.* — *Secunda difficultas.* — Solum supersunt duo dubiosa explicanda circa dicta. Unum est, quia posuimus æquinoctium statuendum esse in 21 die martii, et ex illo tanquam ex certo et immutabili fundamento reliqua omnia esse deducenda. At illud mutabile etiam est juxta numerationem nostrorum dierum, mensium et annorum, qui non adæquate respondent

motibus cœli, ut est constans apud astronomicos; nam communis noster annus fere per sex horas deficit ab integro circulo solari per motum proprium; unde fit ut æquinoctium uno anno contingens, verbi gratia, sexta hora matutina diei, alio accidat hora 12, et in sequenti in hora sexta pomeridiana; et ita consequenter ut alio anno cadat æquinoctium in 22 martii, et sic paulatim mutetur. Atque hinc fiet ut, si semper utamur 21 die martii pro æquinoctio, accidat interdum ut luna 14 ante æquinoctium numeretur, et sic evertatur tota ratio colligendi verum diem paschatis. Aliud dubium est, quia juxta hanc computationem non poterit festum Paschatis celebrari eodem die naturali in universo mundo, quod admittendum non est. Sequela patet, quia æquinoctium vernum non est in universo orbe in eodem die, sed aliis citius, aliis tardius accidit, juxta diversitatem regionum, et tanta est inter aliquas regiones oppositio, ut quod uni est æquinoctium vernum, alteri sit autumnale.

27. *Enodatur primum dubium.* — Respondetur ad priorem partem, ex communi et vera doctrina, quam Clavius dictis in locis copiose et erudite explicat, verum quidem esse computationem ecclesiasticam non correspondere exacte et ad amissim circulationibus cœli, id vero non esse inconveniens, quia hæc res non mathematicæ, sed moraliter pensanda est; nam hoc totum ex jure ecclesiastico pendet, quod humanum est, et non poterat alio modo moraliter fieri, nec expediebat redigere totam Ecclesiam ad summam Astronomiæ subtilitatem, neque id erat necessarium ad convenientem mysteriorum Christi celebrationem, quæ in his festivitatibus et observationibus intenditur. Atque ita distinguuntur duplex æquinoctium, unum naturale, aliud ecclesiasticum seu ex institutione; illud vix cognoscitur et attingitur ab hominibus, prout in se est, sed solum plus minusve; secundum ergo oportuit esse certum, et omnibus facile cognitum, ut juxta illud regula celebrandi Pascha computaretur. Quia vero hæc institutio, ut convenienter fiat, debet accedere ad naturalem, quantum moraliter fieri possit, ideo curatum diligenter est, ut observatio ecclesiastici æquinoctii non multum a naturali distet; et si cursu temporis paulatim ab illo recedat plus quam oportet, ad illud revocetur. Sic ergo ex antiqua institutione Julii Cæsaris, quam Ecclesia retinet, illa mutatio, quæ fit in annis, propter horas quæ in

singulis annis communibus deficient, quarto quoque anno, qui bissextilis dicitur, reparatur per additionem unius diei, per quam æquinoctium ad suum statum revocatur. Et intra curriculum trium vel quatuor annorum, non habetur ratio illius mutationis, seu positionis æquinoctii, etiamsi in re ipsa contingat ab uno die naturali in alium proximum sequenti anno transferri; quia, ut dixi, non potest aliter commode fieri, et Ecclesia non tam subtiliter hæc expendit, sed moraliter. Unde etiam per additionem unius diei integri naturalis, quæ in anno bissextili fit, in aliud extremum transitur, quia additio est aliquantulum major quam esset necessaria. Quoniam in singulis annis communibus non deficient sex horæ integræ, et postea suppleuntur integræ: unde fit ut æquinoctia, prout in re fiunt, singulis annis anticipentur aliquantulum, et paulatim præveniant diem 21 martii per unum, duos, vel plures dies. Et nihilominus Ecclesia semper usa est, a temporibus Concilii Niceni, die illo 21 pro æquinoctio, propter difficultatem magnam reducendi et confirmandi semper æquinoctium ecclesiasticum, ad proprium diem in quo revera existit. Quia vero illa discrepantia jam erat nimia, et in dies futura erat major, difficultatem illam superavit insignis Pontifex Gregorius XIII, et Kalendarium correxit, subtractis decem diebus anni 1582, in mense octobri, et modum invenit, quo in posterum æquinoctium vernum firmiter staret in eadem die 21 martii, parum aut nihil recedendo ab æquinoctio naturali, statuendo ut in posterum, in singulis centenariis annorum, unus dies subtrahatur, ita ut ultimus annus centenarii, qui futurus fuisset bissextilis, non sit bissextilis, sed communis. Nam tempore centum annorum, plus minusve, per additionem dierum bissextilium, quæ fit quarto quoque anno, unus dies ultra necessarios additus erat; et ita etiam æquinoctium per unum diem anticipatum fuerat; per subtractionem autem unius diei ad propriam sedem revocatur. Hoc ergo modo et sensu, recte æquinoctium in 21 martii collocatur, et ad celebrationem legitimam Paschæ sufficienter deservit.

28. *Satisfit secundæ dubitationi.* — Ad secundam dubitationem respondetur, sine dubio Paschæ festum celebrandum esse a Christianis totius orbis in eodem die, in eo nimirum in quo Romana Ecclesia illud celebrat. Ita enim Pontifices Romani, Pius, Victor et sequentes statuerunt, qui jus habent statu-

di pro universo orbe. Ita etiam Concilium Nicenum decrevit; ut enim supra ex Theodoro retuli, voluit omnes Orientales conformari Ecclesiae Romanae in celebratione Paschatis: loquitur autem de Orientalibus dissentientibus, et ita plane vult omnes fideles in hoc conformari. Unde Eusebius supra refert statuisse Concilium, ut omnes uno die Pascha celebrarent. Idemque significat Concilium Antiochenum, et satis etiam declaravit Constantinus in sua epistola, cujus verba supra retuli. Et in Concilio Arelatensi I, cap. primo dicitur: *De observatione Paschae Domini statuimus, ut uno die et tempore per omnem orbem observetur, et juxta consuetudinem litteras ad omnes tu dirigas.* Scribunt enim ad Silvestrum Papam, et ideo fortasse in decreto Gregoriano, de Consec., distinct. tertia, ubi hoc cap. refertur, additur, confirmatum esse a Silvestro Papa. Similiter in Concilio Carthagenensi IV, cap. 65: *Paschae solemnitas (dicitur) uno die et tempore celebranda est.* Idemque colligitur ex cap. *Placuit*, 1 et 2, de Consec., dist. 3. Denique idem constat ex Leone Papa, epist. 64 ad Martianum: dicit enim ex errore contingere interdum, *quod non licet, ut non simul omnis Ecclesia, quod non nisi unum esse oportet, observet.* Idem fere habet in epist. 65, et optime in 95, ubi, ad episcopos Galliae et Hispaniae scribens, ait, cavendum esse, *ne in Paschalis festi die vel ignorantia, vel praesumptio peccatum diversitatis incurrat.* Juvat etiam, quod in Concilio Aureliano IV, cap. 1, dicitur uno die esse Pascha celebrandum, et si aliquod dubium occurrat, a Sede Apostolica sacram constitutionem esse tenendam. Nec obstat huic legi, et universali consuetudini Ecclesiae, quod tardius aut citius aequinoctium in aliquibus provinciis contingat; quia omnes servare debent aequinoctium ab Ecclesia designatum, et id satis est, ut dixi; unde non refert quod alicubi sit aequinoctium autumnale, illud quod nobis est vernale, quia regula sumi debet ex regione Judaeae; tum quia ibi Christus est mortuus prope aequinoctium vernale; tum etiam quia in Ecclesia Romana idem est aequinoctium. Estque animadversione dignum, quod sicut Christus resurrexit eo tempore, quo in nostro hemisphaerio incipit vernum tempus, ita etiam mortuus est in illo tempore, in quo habitantibus in alio hemisphaerio incipit autumnus; et ideo mirum non est quod eodem die omnes festum illud celebremus, licet nobis vernale sit, aliis au-

tumnale. Quod si quae difficultates in aliis regionibus occurrant, per providentiam Summi Pontificis subveniendum est, ut et sciant, et commode valeant tum festum ipsum, tum caetera, quae anteedunt et subsequuntur, opportune agere. Ita enim semper habuit consuetudo, ut dicitur in dicto Concilio Arelatensi, et in Litteris Pontificiis Pii, Victoris, Innocentii et Leonis, supra relatis. Atque haec praesenti loco de hac festivitate sufficiunt; nam de fundamento illius, quod est tempus mortis et resurrectionis Christi Domini, in secundo tomo tertiae partis copiose a nobis disputatum est.

CAPUT VII.

DE ALIIS FESTIVITATIBUS AD CHRISTI GLORIAM PERTINENTIBUS.

1. *Festum Ascensionis.* — *Ascensionis festum ab Apostolis manavit.* — *Festum hoc generale est.* — Post Resurrectionem, celebrat Ecclesia alia festa mobilia, inter quae primum locum obtinet Ascensio, estque nonum festum ad Christum pertinens, de quo his verbis scribit Clemens, lib. 5, cap. 18: *Numeratis (ait) quadraginta diebus a primo dominico die, celebrate festum Assumptionis Domini, etc.;* et lib. 8, cap. 33, ait: *Die Assumptionis vacent, quod hic fuerit impositus finis aeternae Christi:* unde constat hoc festum antiquissimum esse, nam ab Apostolis manavit, nec aliud initium perpetuae consuetudinis de illius observatione cognoscitur; ut constat etiam ex antiquissimis Patribus, festum illud suis orationibus seu homiliis celebrantibus. De illo enim dixit Epiphanius, Constantiae Episcopus: *Celebramus Christi Domini secundum carnem ascensum, quod sane festum inter Dominica fastigium obtinet; ut enim caput totam corporis constitutionem exornat, ita haec solemnitas divinae aeternae pulchritudinem, quasi colophonem illi imponens, mirifice illustrat.* Et ideo etiam illud vocat *festorum decus*; et Augustinus, serm. 174 de Tempore, ait glorificationem Christi in resurrectione factam, in ascensione fuisse completam, et ideo utrumque festum celebrari; et serm. 176 addit aliam causam, quia sicut resurgendo, spem nobis resurgendi contulit, ita ascendendo, *victoribus quo sequantur, ostendit.* Et multa similia in Leone Papa et aliis Patribus, in concionibus illius festi legi possunt. Denique hoc festum inter generalia totius Ecclesiae in jure etiam

ponitur, in dicto cap. ultim. de Feriis, et in cap. 1 de Consec., dist. 3. Circa quem textum obiter advertendum est, addi in illo capite, et quasi cum hoc festo conjungi tres antecedentes dies, qui Rogationum dicuntur, propter solemnes Litanias quae in illis tribus diebus dicuntur, unde videntur olim fuisse festivi, et in praeepto. Nunc autem certum est non ita esse, ut Anton. supra et omnes Summistae tradunt, et Doctores in dicto cap. 1, et ultimo, et constat ex communi usu totius Ecclesiae. Neque forte ullo tempore praeeptum illud generaliter observatum est. Nam caput illud non est alicujus Pontificis, sed Concilii Lugdunensis inscribitur, quod non exstat in tomis Conciliorum, et solum provinciale fuit, quod totam Ecclesiam obligare non potuit; unde verisimile est peculiarem consuetudinem alicujus provinciae, quoad hanc partem, declarasse, sicut de aliis in illo capite contentis postea videbimus. Tandem de tempore in quo festum hoc celebrandum est, constat definitum esse ad certam hebdomadae diem, scilicet, feriam quintam, quia in illa completur dies quadragismus a die resurrectionis, quo die quadragesimo Christus ascendit. Quoad diem autem mensis hoc festum inter mobilia computatur, quia semper cum proportione sequitur ad diem Dominicae resurrectionis; ita enim propriis temporibus, et cum exacta, non solum memoria, sed etiam representatione haec festa celebrantur: caetera de ipso mysterio, quod in hoc festo celebratur, in dicto 2 tom., disp. 51, tractata sunt.

2. *Festum Pentecostes.* — *Cur Pentecostes numeretur inter Christi festa.* — *Pentecostes in lege veteri fuit de jure divino.* — Decimum festum est adventus Spiritus Sancti in discipulos in die Pentecostes. Nam licet hoc festum potius de Spiritu Sancto, quam de Christo Domino esse videatur, tamen, quia ipse Christus Spiritum Sanctum promiserat, et verbum suum illo die implevit, et quia donatio etiam Spiritus Sancti fructus fuit meritorum Christi; ac denique quia in hoc die quasi coepit Christus regnare in Ecclesia sua militante, coepitque publice praedicari in universo mundo, ideo inter festa Christi hoc annumeratur. Atque ita hoc eodem loco illud ponunt Clemens Papa, dicto lib. 8, c. 33, et lib. 5, c. 49; et Gregorius IX, dicto cap. ult.; et Concilium Lugdunense, in cap. 1; Isidorus, lib. 1 de Divin. offic., cap. 33. Et ejusdem festi meminit etiam Tertullianus, libr. de Coron. milit.; Basil., de Spiritu Sancto, cap. 27; Epipha-

nus, in fin. Panarii; Justin., quaest. 15; Hilarius, in proem. Psalm.; Augustinus, lib. 31 contra Faustum, cap. 12, et epist. 118, cap. 1, et epist. 119, cap. 15 et 16, et in 17 concludit, *haec de Scripturis firmissime teneri Pascha et Pentecosten.* Unde multi arbitrantur de hoc festo loqui Lucam, Actor. 20, cum ait de Paulo: *Festinabat enim, si possibile sibi esset, ut diem Pentecostes faceret Jerosolymis;* quia non erat tam sollicitus de festivitate Judaica, sicut de Christiana; item de eodem loqui Paulum ipsum, 1 Corint. 16, cum ait: *Permanebo autem Ephesi usque ad Pentecosten.* Cum enim ad fideles scriberet, verisimile est locutum fuisse de festivitate solemnium, et nota omnibus Christianis, atque adeo illam fuisse jam tunc servatam, et illo nomine appellatam. Et ita intellexit illa loca Epiphanius, haeres. 75, et idem sentit Hieronymus in proemio Epistolae ad Ephesios, qui etiam hujus festi mentionem fecit ad Galat. 4 et Matth. 9. Hoc denique festum antiquissimi Patres, suis concionibus et homiliis, celeberrimum semper fuisse ostendunt. Unde aliqui putarunt, non esse humano jure praeeptum, sed divino. Verumtamen regula saepe repetita tenenda est, in lege evangelica non esse data de his caeremoniis peculiaribus praeepta divina, sed Ecclesiae dispositioni fuisse commissa. Festum ergo Pentecostes, prout in lege veteri fuit observatum, de jure divino fuit; illud autem jam cessavit: quia vero festum illud antiquum figura fuit diei Pentecostes, et adventus Spiritus Sancti, ac promulgationis legis novae, quae in illo facta est, ideo hoc etiam festum legis gratiae quodammodo et per quamdam imitationem ab illo jure manavit, simpliciter autem et in se ecclesiasticum est. Habet tamen gravissimum fundamentum et causam immutabilem, ideoque tale est, ut moraliter mutari non possit, sicut de aliis dictum est. Denique hoc festum, sicut et Pascha, voluit Ecclesia, non uno tantum die dominico, sed etiam per duas sequentes ferias solemniter celebrari et servari, ut sumitur ex citatis juribus, et constat ex usu Ecclesiae, et omnibus auctoribus; caetera vero quae de illius diei mysterio scholastice disputari possunt, tetigimus sufficienter in dicto 2 tom., disp. 46, sect. 1, ad finem, et in 1 p., lib. 12 de Trinit., cap. 6.

3. *Festum corporis Christi.* — *Festum Corporis Christi quando inceperit.* — Undecimum Domini festum est de sancto Eucharistiae mysterio, quod festum corporis Christi appella-